

Date – 19/06/2026

Time - 18:30 -18:40Hrs

**AKASHVANI AIZAWL
REGIONAL NEWS BULLETIN
HEADLINES (EVENING)**

1. Mizoram aiawh tur Rajya Sabha MP thar Pu Khiangte Laltluangkima Mizoram sorkar flagship programme hlawhtlinna chu a ngaihpawimawh ber tur anih thu a sawi.
2. HORTI FAIR 2026, Aizawl Lammuala neih mekah ni 2 chhungin cheng nuai 35, sang 2,940 man hralhchhuah a ni tawh.
3. Prime Minister Narendra Modia chuan ni 5 chhung hlawhtling takin France leh Slovakia a tlawh.
4. Darkar 24 kalta chhungin Jharkhand-ah tekin mi 8 a denghlum.

<><><>

MP

Mizoram aiawh tur Rajya Sabha MP thar Pu Khiangte Laltluangkima Mizoram sorkar flagship programme hlawhtlinna chu a ngaihpawimawh ber tur anih thu a sawi.

Pu Laltluangkima chuan mipui tan theihtawp a chhuah dawn tih a sawi a, Mizoram sorkarin hmalakna lian tham leh hmachhawp a neih te a hlawhtlin ngei theih nan Delhi lama lo bawhzui chu a ngaihpawimawh a nih tur thu a sawi.

Pu Khiangte Laltluangkima hian Lok Sabha MP Richard Vanlalhmangaiha ang bawkin a thutna tur a chiang sa tawh tih a sawi a, vote thlak hunah chuan issue mil zela vote an thlak tur thu a sawi bawk a ni.

Election Commission of India (ECI) remruatnain nimin khan Mizoram Legislative Assembly-a MLA 40 zinga MLA 36 te chuan Mizoram aiawh tur Rajya Sabha MP hi Mizoram Legislative Assembly Secretariat Annexe building-ah an thlang a, tlai dar 5 khan vote tla te hi chhiar nghal a ni.

Mizoram Rajya Sabha MP thlan thar Pu Khiangte Laltluangkima hian vote 26 hmu in, a khingpui MNF Candidate Zothansangi Hmar chuan vote 10 a hmu thung a ni. Puan tawh angin tun tum MP inthlanah hian Mizoram BJP leh Congress te chuan vote an thlak lo a, damlohna avangin ZPM MLA Pu W. Chhuanawma chuan vote a thlak thei lo bawk a ni.

Vawiin khan ZPM General Headquarters chuan Pu K Laltluangkima lawmpuina hun leh Pathian hnena lawmthu sawina hun an hmang a, thusawiin Pu K Laltluangkima chuan tun tum Rajya Sabha MP inthlan chu a hahthlak a tih thu sawiin, nasa taka chhah buai an ni a, Rajya Sabha MP thlan hmasak khan ZPM pawh opposition an ni a, khatih laia rorel lai candidate kha chhah buai lovin tuang takin inthlanna neih a ni a ti a, amaherawhchu an thil tum a khirh poh leh a hlawhtlinna a thlum ve thung a ti a ni.



EXCISE

Excise & Narcotics Department-in hriselna kaihhnawih avanga IMFL kawh leh zu in phalna 'Red Card' an pek chhuah turah mi 90-in dilna form an la chhuak tawh a, dilna theh lut an la awm lo thung.

Akashvani Aizawl zawhna chhangin, END-a thawkte chuan Red Card hmanga IMFL hralh chhuak tur hian engkim peih fel a ni tawh tih sawiin, Red Card dilna tur form lakchhuahna turin Commissionerate office ground floor-ah desk siam a ni an ti a, tun thla June ni 3 atang khan Red Card dilna form an pe chhuak tan tawh a, wawiin June ni 19 thleng hian mi 90 hnenah pekchhuah a ni tawh tih an sawi.

Red Card nei tur hian doctor te'n damdawi atana an chawhna lehkha an neih hnuah an awmna District Medical Superintendent ten an chawhna chhante en fiahin, phalna an pekte hnenah chauh Red Card hi pek an ni dawn a. Red Card hi kum khatah Rs. 5,000 man zel a ni dawn a, Aizawla Excise pisa-ah END chuan Departmental Store siamin, zu an man, Court-in a tihfel tawhte chu Red Card neite tana hralh chhuah a ni dawn a. Zu chu a man pangngai aia zaa 75-a tlawmin hralh a ni dawn a ni.

Hei bakah hian END-a thawkte chuan Mizorama kuthnathawktute hlawkna chu sorkarin a duh ber avangin, Hnahlan leh Champhai winery atanga siamchhuah Grape wine zuar turin phalna bik a ngai tawh lova, tute pawhin an zuar thei tawh tih an sawi bawh a ni.



HORTI FAIR

HORTI FAIR 2026, Aizawl Lammuala neih mekah ni 2 chhungin cheng nuai 35, sang 2,940 man hralhchhuah a ni tawh.

Akashvani Aizawl News zawhna chhangin Horticulture Department a thawkte chuan HORTI FAIR 2026-ah hian stall 273 a awm tih sawiin, an beisei aiin mipuiin an hlut tih an sawi a, an hawnni khan cheng nuai 14, sing 6, sang 4,730 man a hralh tawh a, nimin khan nuai 20, sing 3, sang 8,210 man hralh lehin ni hnih chhungin cheng nuai 35, sang 2,940 man hralhchhuah a ni tahw tih an sawi.

Horticulture Fair hi thei, thlai leh pangpar thara zuartuten hlawkna an neih theih nan kum 2012 atang khan a remchan danin neih thin a ni a; kumin hian a vawikhat nan Lammualah Fair siam a ni.



PM-VBRY

Aizawla Employees Provident Fund Organisation, Special State Office buatsaih Pradhan Mantri Viksit Rozgar Yojona (PM-VBRY) inhrilhzauna hun wawiin tlai khan Labour & Employment Minister Pu Lalnghinglova Hmar chuan Tuikhuahtlanga PIB Conference Hall ah a hawng a,

Hawanna thusawiin Pu Lalnghinglova chuan Ram pum hmalakna hnuaiah Mizoram a tel ve chu chhuanawm a tih thu a sawi a. Hnathawktute leh an

chhungkaw hamthatna tura sorkar laipui Ministry of Labour & Employment in scheme pawimawh tak a siam chu fakawm a tih thu a sawi a. Employees' Provident Fund Organisation, EPFO, chuan formal sector a hnathawktute chu an hnathawh atanga an chawlh hun(retirement) thlengin a humhim thei a, pension a siamsak thei a, chhungkaw tak tak a humhim a ni a ti a.

Pradhan Mantri Viksit Bharat Rozgar Yojana, PM-VBRY chu hnathawktute hamthatna atana siam scheme a ni a ti bawk.

<><><>

UD&PA MINISTER

Tuialhthei renchemna atan hma lakna kal zelah tlawh kualnaah hian lirthei hrang hranga inzui lovin, Lunglei-a Development & Poverty Alleviation tlawhtu UD&PA Minister Pu K. Sapdanga leh amah zuitute chu Mizoram State Transport (MST) bus hmangin a huhovin an kal kual.

UD&PA Minister Pu K. Sapdanga hi Lunglei South bialtu MLA Pu Lalramliana Papua, Lunglei West bialtu MLA Pu T. Lalhlimpaia, Lunglei Municipal Council (LMC) Chairman Pu Lalzuithanga leh councillor-te, UD&PA Commissioner & Secretary Pu K. Lalthawmmawia, Director Pu Jacob Lalawmpuia, LMC Chief Executive Officer Pu Lalhmananga leh official dangte'n an tawiam a ni.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Naktuk zing dar 7 leh a chanve-ah Chanchinthar puan leh a ni ang.

<><><>

ACCIDENT

Vawiin chhun dar 12 vel khan eingrawngbawlina Gas phur Assam Truck pakhat chu a tlan laiin, Kolasib Venglai East, Silchar Road ah a kang a, thi leh hliam an awm lo.

Gas phur lirthei hi Borkhola Gas Bottling Plant, Assam atanga load la niin, Siaha a dah tur a ni a, a kan lai hian Gas cylinder (bur) 342 a phur a ni.

Thudawn dan in, lirthei hi a hlui tawh avangin wiring fail vanga kang a nih an ring ber a. Gas a phurhte a puah hmain Fire & Emergency Services lamin an thelh mit hman a ni.

<><><>

MPCC

Mizoram Pradesh Congress Committee MPCC thupuangtu Dr.Lallianchhungan ZPM sorkar chuan Mipuite rawk dan chikimin rawk an tum ni berin a lang a ti

Vawiina MPCC chhung inkhawm Aizawl Congress Bhavan-a neihah thu sawiin Pu Lallianchhunga chuan ZPM sorkarin Mizo App hman tur tia Taxi ho an tukluh chu engdang ni loin, mipuite atanga chhiah an khawna hmanrua tur a ni a ti a. India ram khawpui lian UBER leh OLA hmannaah Taxi neitute'n Registration Fee cheng khatmah an chawi loh laiin, Mizoramah chuan Registration Fee cheng 500 an chawi dawn a. Taxi hmangtute'n chhiah an pekna tur atana Mizo App hi siam a ni ber a ti a ni.

ZPM sorkar chu leiba tipung nasa tur zawngin, a tlaran zawngin an khawsa a. State nih hnuah Budget aiin leiba a tam phah ta tiin Pu Lallianchhunga chuan a sawi a, kumin 2026-2027 Mizoram Budget chu cheng vbch 17,076 a nih laiin, leiba chu cheng vbch 19,085 a ni dawn a ni a ti a. Mizoram chu leiba thangah an tantir a ni ringawt a. Sorkar leh tur tan pawh buaipui tham leiba ZPM sorkar hian a hnutchhiah hman dawn a, ZPM ENCHHIN chu a pawh hle a ni a ti .

Congress Bhavan a Political Session hi MPCC Gen.Secy Pu C.Dothersangan a kaihrui a ni.

<><><>

PM

Prime Minister Narendra Modia chuan ni 5 chhung hlawhtling takin France leh Slovakia a tlawh. France-a cham chhungin Evian-a G7 Summit ah a tel a. US President Donald Trump, German Chancellor Friedric Merz, British Prime Minister Keir Starmer leh UAE President Whiekh Mohamed bin Zayed Al Nahyan te a G7 Summit karlakah a kawm a. French President Emanuel Macron nen Nice khawpuih Bharat Innovates an hawng a. He hunah hian India, France leh khawvel hmundang atanga startups, innovator-te leh venture capital fund te an kalkhawm a ni.

Pu Modia hian Slovakia-ah a cham chhungin Slovak President Peter Pellegrini nen an inkawm a. Hei bakah hian Slovakia ram chawimawina sang ber The Order of the White Double Cross,First Class hlan a ni.

<><><>

JHARKHAND

Darkar 24 kalta chhungin Jharkhand-ah tekin mi 8 an denghlum. Thudawn danin Hazaribagh district ah thi tam berin mi pathum an thi a, Ramgarh, Palamu, Lohardaga, Godda leh West Singhbhum district-ah mi pakhat theuh an thi a. Hliam tuar engemawzat an awm bawk a ni.

<><><>